

〔清〕溫汝能纂輯

呂永光等整理

李曲齋陳永正審定

粵東詩海

中山大學出版社

中

〔清〕溫汝能纂輯
呂永光等整理
李曲齋陳永正審定

粵東詩海（中）

中山大學出版社
· 廣州 ·

卷二十五

李時行

李時行（一五一四—一五六九年），字少偕，番禺（今廣州）人。少時讀書羅浮山青霞谷，自號青霞子。明嘉靖二十年（一五四一年）舉進士第。授浙江嘉興知縣，其地多宦族巨家，桀驁難治，而他不畏權貴，悉行執法。叙績擢南京兵部車駕司主事。同官忌其名，惡語中傷，遂弃職浪游，與山人陳鳴野、李岫巖結社論詩。遍游吳、越、燕、齊、梁之故墟，度薊門，過塞北，作詩抒懷，以散其孤憤激昂之氣。晚年南歸廣州，在西郊築浮邱草堂讀書。卒年五十六。著有駕部集、青霞漫稿等。時行工詩，為南園後五先生之一。其詩多得益於山水靈氣，集中有不少格調高昂之作，在當時濃厚的復古主義的氛圍中，甚是難能可貴。

田汝成云：李駕部襟懷光霽，洞測玄機，故其詩曰：已悟浮生理，渾忘去住心。寄迹市廛，雅尚幽壑。故其詩曰：瞻此碧岩栖，因之定吾性。不自盈假，求益無方。故其詩曰：麗澤苟無從，虛此年歲侵。迪志冲素，久要自勛。故其詩曰：撫景澹忘歸，永懷歲云莫。推此類也，可以觀所養矣。

文徵明云：少偕文章法漢魏，古詩法顏謝，歌行法李杜，絕律則又取裁于沈宋王孟諸大家，咸超詣入品，信得江山之助。又云：觀其詞意，夷曠冲澹，優游閑適，若栖踪霞外，游神物表，非敝屣軒冕、浮雲富貴者，烏能詣此。

龐少南云：先生詩托興寓言，有風人之體。又云：駕部早謝榮途，考其論著，囊括乾坤，蕩磨日月，獨希聲古聞人，天之所以壽其名，使百世不朽，其在斯乎。

何子明云：先生家居，開浮邱草堂及小雲林，以托栖隱，立意不關時事，惟日漁獵群籍，訂以心學，發所自得，形于著論，融融焉，洋洋焉，成一家

言矣。

徐獻忠云：駕部詩雋拔古雅，跌宕不羈，興溢言詮，詞超象外，如懷友詩云：秋聲孤樹杪，月色萬峰頭。訪隱云：徑緣芳草入，溪帶落花流。游寺云：香烟迷鳥道。花雨濕人衣。贈僧云：振錫歸林鶴，揮雲起鉢龍。春日云：細草和烟綠。疏花帶雨紅。咏美人云：桃含歌裏笑，柳人怨邊顰。又如：雨深青蘚合，潮長白雲平。露氣千林涼若雨，水光一片瑩如空。香含白雪梅初綻，寒破青氍草欲生。皆刊落陳言，獨趨三昧，真可以齊轡作者，繼軌藝林矣。

車夢洲云：駕部博游于吳、越、燕、齊、楚、豫之交，凡遇名山勝迹，流連累日，登臨吟眺，以磅礴其氣，而又遍交海內人豪，結社聯吟，風晨月夕，以跌宕其才，故其形之翰墨，間者有若摩星浴日，凌五岳而歎三江，視世之尋聲貌古者相去遠矣。

伏睹西苑諸勝有作

天都蘊靈奇，帝闕儼蓬島。瓊華列綺疏，太液涵蒼

昊。玉輦駕飛梁，金鰲夾馳道。風恬鳥去遲，華發春歸早。宮垣燦金焦，湍水春秋稻。縹緲兔園山，穴洞靚如掃。雲梯古石盤，霧壑春流抱。垂崖下猿蘿，碧沼翻鳧藻。迤邐度平臺，歷覽周靈造。萬億鞏皇圖，願言歌豐鎬。

游西山

龍軸開天甸，靈岳表皇畿。氤氳藹佳氣，官邈飛丹梯。仰瞻出九穹，俯視盡入維。日宮懸漢構，星觀接雲栖。香泉下筠壑，輦道回松溪。玲瓏信天造，合沓駭神迷。伊余欣獨往，攀陟閱多奇。千岩盤福地，百卉濯仙姿。綺麗駕洛中，雄赫卑關西。鴻圖允鞏固，靈長億萬斯。

咏懷

涉世寡所諧，雅志在丘壑。投簪歸青山，守拙甘寂寞。稍擬漢陰釣，還尋鹿門樂。當春理東畬，及秋事躬穫。暇日呼朋友，烟蘿成野酌。巨觥交勸酬，清謳間諧謔。忘形穹壤間，矯首同飛躍。黃鵠摩青霄，陋彼燕與雀。永結逍遙游，已矣謝羈縛。

林居忽不恆，理篋事行游。名奇夙所慕，誓將八極周。泰岱寄萍迹，河淮漾蘭舟。宇宙何寥廓，心曠乃良謀。為樂苦不早，歲月去我遒。豈伊向平問，婚嫁畢已否。雲鵬有奇翼，九萬何悠悠。不學夸毗子，終日懷百憂。

皇虞道已遠，班馬競馳騖。賈董揚頽波，楊枚逞芳度。茲矩日云沒，新聲混韶濩。商鼎與周彝，所貴在真素。雕飾豈不華，本實惜先蠹。蹇予事鉛槧，謬希作者路。穎弘寄餘閑，聊以展幽趣。所憂在驚駘，恐失天馬步。

東周布遺種，香色錯然陳。漢魏接餘芳，枝幹猶足珍。流風入建安，畦徑漸荆榛。六代競豪華，剪彩以炫真。生意日萎蕸，垂蔓徒紛纈。偉哉伯玉子，培根歸渾淪。開元與天寶，花實相鮮新。物盛則必反，繼者難其人。蹇予寡且昧，頽風竟何振。眷茲性情理，追逐疲心神。

芝蘭生幽谷，不隨衆草芳。日暮天風吹，清芬自飄揚。何如桃李華，灼灼弄春光。驚風一披拂，繁華

委道傍。人生非金石。百歲乃其常。苟不事令名，奄忽何足傷。所以君子心，秉義日遑遑。安能甘逸豫，歲晚徒慨慷。

宿湖南淨寺

攬勝投名山，信迹遵玄境。興隨覺路遙，心與空門靜。雲樹澹蕭疏，水月相輝映。天寒夕梵微，木落霜鐘應。倦鳥下松林，歸僧掩蘿徑。景眺遐想舒，物討幽懷罄。揮琴鶴共娛，講法龍爭聽。祇樹鳴山風，雨花落湖鏡。于焉結芳桂，聊以祛塵病。睠此碧岩栖，因之定吾性。

俠客行

長安俠少年，結束事行邊。珠璣絡戰馬，白羽控飛弦。流盼萬人靡，光彩何翩翩。暮宿歸燕市，朝游出甘泉。黃金買死士，白璧奉高賢。個儻負奇氣，談笑兵圍間。所歡在知己，軀命乃易捐。

彭城道中

秣馬肅徒侶，晨征越郊邑。林莽何蕭條，颯颯陰風集。云是古戰場，殺氣餘慘惻。伊昔楚漢交，兩雄

正相厄。巨野卷旌麾，摩空耀戈戟。朱火赫以飛，白龍自奔匿。恃力亦何為，鬥智終靡益。英雄等物化，勞勞竟陳迹。空嗟耕隴間，黃沙亂白骨。

經徐孺子墓

漢道日隳頽，皇綱弛難收。群小握機要，李杜墮奸謀。耿耿徐夫子，端居識其由。飭躬事溫清，斂志遵園邱。秉操瑩不磨，浮榮安足尤。生芻致逾玄，下榻望彌修。可否夷惠間，溷世揚清流。嗟余遠行役，飄搖入南州。淒其枳棘叢，斷碣標荒陬。芳踪隨化滅，高風邈難求。千秋徒景切，驅馬重遲留。

長門怨

涼飈送朱火，庭樹下微霜。娟娟素明月，照妾羅衣裳。遲回循廣除，蟋蟀鳴北堂。感物思鬱紆，況茲夜未央。故恩坐搖落，新歡詎可量。音微渺難接，婉孌不能忘。昔為雙飛鸞，今作單鴛鴦。容華安足恃，顧影徒自傷。保君金石軀，千秋樂景光。

情詩

曖曖雲間月，圓缺自有時。翩翩梁上燕，猶傍故巢

歸。如何遠游子，去去無返期。別時春花芳，今見秋葉飛。洞房夜淒其，寂歷生塵絲。流螢入孤幔，蟋蟀鳴坐隅。精誠感宵夢，會晤空斯須。寧作清流源，不作濁水泥。冰霜諒自保，茲懷君詎知。

出自薊北門行

十五學擊劍，英雄寡為儔。裂眚報仇家，高視蔑王侯。一旦羽書至，願言分國憂。揮手去鄉邑，振奮出邊州。白馬疾如飛，楛矢剽若流。左貫烏丸腹，右飲月支頭。重圍既已解，談笑任行游。功成拂衣去，爵賞非所求。

讀離騷經

物性畏剽剽，人情忌孤蹇。蘭以香就焚，膏因明自滅。潔躬能取尤，高才終見遠。鄭衛登中堂，韶英聽斯緩。溷流趨靡靡，誰復察區款。靈均多遺悲，漁父有先見。皎皎明月珠，湓矣沉湘沅。至人執玄樞，俯仰能自遣。無為以為寶，隨時任舒卷。

感咏

默坐觀元化，泰初本鴻濛。人文既開朗，元和乃漸

通。世事有盛衰，治亂互相從。消息幹其權，厥運始復終。氣機本自然，太始不施功。至人秉無為，端拱無極中。下觀蟻子群，蝸角競豪雄。萬劫終委壞，浮雲歸太空。得喪虛欣戚，胸次徒憧憧。

吾愛陶彭澤，達觀忘俗筌。一官但適意，不為生產牽。飢時出門去，乞食向人前。有則喜留客，鷄黍長開筵。故人或見惠，悉付酒家錢。遇飲即求醉，且了一日緣。萬事不著念，平生任自然。清風在五柳，今古慕高賢。

浮榮衆所慕，詰旦趨朝市。群兒爭一餅，得者每自喜。有時稍失意，懊惱由中起。豈惟自懊惱，殆辱從茲始。所以高蹈人，視之如敝屣。鹿門自躬耕，谷口窮靜理。倦鳥栖茂林，游魚隱深沚。終身長避喧，至樂應無比。

計然抱十策，上干越王庭。勾踐用其三，富國逞雄兵。范蠡往師之，佐越破吳城。功成泛湖去，拂衣且辭榮。隱居齊魯間，遂著陶朱名。然也誠智囊，而蠡術亦精。保身全明哲，千載垂英聲。

廬山歌

匡廬之山何崢嶸，洪崖奔壑凌空起。靈源萬古自天成，福地紆盤三百里。群峰岩崑近日邊，玄宮下與十洲連。猿梯鳥道不可度，仰攀絕頂雲烟。虎溪斜接朱霞島，更向雲端尋五老。碧草攢生不記年，琪花半落無人掃。碧草琪花處處逢，祥烟時繞香爐峰。石鏡光中回日月，錦屏影裏出芙蓉。逶迤瀑布飛寒玉，窈窕陰崖藏石屋。閑隨野客采青芝，靜對仙人調白鹿。萬丈飛虹跨石潭，天池龍去水流丹。九江風雨凝朝靄，七澤波濤起暮寒。竹林梵宇知何處，空華自映娑羅樹。神僧飛錫人不聞，惟有仙禽自來去。登臨回首值新秋，自愛名山覽勝游。此去會應逢石髓，重來沐鶴住丹邱。

姑蘇曲

三月三江口，垂楊復垂柳。朝看燕引雛。暮聽鶯求友。此時花鳥競妖妍，此際風光正可鄰。錦轡分飛爭道路，朱輪合沓出郊塵。千門簫管聲如沸，公子豪華多意氣。雕戟雲凝故相家，玉蘭花覆將軍第。

春衣制紫絨，劍佩拂猩紅。暫醉專諸宅，還宿館娃宮。館娃宮裏飛花滿，姑蘇臺上游絲軟。吳姬二八笑當壚。能向春風歌宛轉。宛轉歌正微，朱顏世復稀。分明不是陽臺路，只愁化作彩雲飛。

醉歌

仰看雲間月，清光圓復缺。俯見枝上花，朝榮暮還歇。人生少壯能幾時，朱顏忽改鬢成絲。如漚之酒且相勸，莫使空留异代悲。韓彭功成身已醢，金張許史今何在。子雲才高翻墮閣，相如卧病文園內。文章富貴亦何有，古往今來同一慨。勸君莫惜千黃金，且向醉鄉斟復斟。臨邛壚頭香且美，醉來擊劍歌古今。飛瓊小玉嬌相向，琵琶細和江南音。人生適意忘憂辱，刀錐世上徒碌碌。觥籌歷亂襟抱開。軒冕銖視誰拘束。君不見章華銅雀今埃塵，妝樓空鎖青娥人。酒星不照夜臺魄，杜鵑叫斷空山春。又不見雍門泣罷田文朽，霍家門外狐兔走。黃金滿贏不肯醉，月落花殘成皓首。

贈王郎

王郎膽氣欲吞海，縱酒高陽三十載。千金不惜贈荆卿，雙壁持將結朱亥。去年烽火警榆州，慷慨辭家赴遠游。倒卷黃沙擒頡利，輕飛白羽落旄頭。縱橫豪氣誰能惜，百戰功高不收籍。貂裘敝盡還復來，卻向秦樓夜吹笛。我勸王郎休嘆嗟，應知人世有張華。吳鉤本是連城價，莫使光芒蝕土華。

送蕭公弼南歸

北風吹雪行人絕，系馬長亭與君別。燕姬歌曲易銷魂，觸得離人轉愁切。一觴滿引不須辭，湖海重逢未有期。君看南國花開日，便是長安相憶時。

贈梁山人歸羅浮山

昔在羅浮兩石樓，逢君身著紫雲裘。凭虛共對烟霞酌，握手相期訪十洲。一從歸卧丹邱裏，滄桑幾度更寒暑。碧山昨日事遨遊，豈知復值同心侶。承語青霞舊洞天，藥欄丹井尚依然。稚川遙寄餐芝訣，鮑靚兼傳紫誥篇。君今東向羅浮去，乘空直上飛雲住。為報蒲仙桂父翁，待予共采三花樹。

長相思

良人家住燕山陽，春花為顏玉為裳。別來不覺已十霜，兩地相思空斷腸。腸斷斷兮愁欲絕，倚闌共對天邊月。月圓仍缺缺仍圓，相思相見還相別。別來消息不曾聞，幾見梅花長夢君。君意悠悠川上水，妾心脈脈隴頭雲。隴頭雲，川上水，歲歲年年只如此。水流雲散自有時，惟有此情無日已。

若耶溪泛舟

溪頭碧樹挂晴霞，一帶溪流映落花。落花渺渺隨流去，蕩漾春光未有涯。沿溪錯雜莓苔色，尚有西施浣紗石。溪邊兒女踏歌來，坐見莓苔空嘆息。泛泛蘭橈得自由，少年春日恣遨遊。鸞簫鳳笛遙相和，共倒金樽醉不休。此時風物真堪羨，過眼韶光疾于電。明朝攜酒擬重來，莫遺楊花亂如霰。

長安道

帝京三月時，香塵暗天起。游絲卷落花，飛入千門裏。甘泉繞建章，大道覆垂楊。雕闌錦樹遙相望，鶯歌燕舞斷人腸。斷人腸，復那許，愁殺娼家女。

妝成起立看紅雨，斜倚銀屏黯不語。

別友人入京

春風送暖入春杯，越客相攜上越臺。柳絮盈盈依袖舞，桃花點點向人開。君去都門期射策，縱馬東城復西陌。沽酒宜尋燕市豪，裁詩莫向秦樓夕。吹徹瓊簫不見君，相思無那惜離群。忽聞江上帆開遠，悵望天南日暮雲。

春堤行

茸茸碧草曲江春，相逢盡是采芳人。簇簇綺羅嬌綠水，紛紛車馬逐香塵。嬉游共訝烟光好，疊榭層臺類仙島。弦聲疑雜鳥聲喧，酒氣偏隨花氣繞。此時上客正淹留，揚鞭挾彈過長楸。遙看蹴鞠東郊外，戲罷鞦韆南陌頭。東郊南陌垂楊綠，拂袖游絲斷仍續。桃李叢中競笑歌，錦屏羅扇春風逐。日暖沙暄燕子飛，新裁白苧換春衣。春堤到處堪行樂，春色娛人不忍歸。

登匡廬絕頂

匡廬最高處，迴與碧空齊。下見衆山小，回看落日

低。松間調野鶴，雲裏聽天鷄。晚逐鐘聲去，相將度虎溪。

別吳山人擴

客中仍送客，離思渺難任。歧路一尊酒，故人千里心。歸雲衝落雁，寒角亂秋砧。湖海風塵裏，前期何處尋。

宿小金山

獨坐雙峰暮，超然遠俗氛。林疏微露月，石峭暗藏雲。清梵連漁唱，飛鷗混鶴群。茫茫天水際，秋色迴難分。

行樂過西莊

行樂莫遲徊，流光暗裏催。雁隨春燕去，老逐少年來。花影移歌席，鶯聲促酒杯。幽懷兼笑口，一日幾回開。

聽張使君美人彈琴

玉指理瑤琴，含情不自任。一彈一惆悵，豈是為知音。夜靜月在水，秋高風滿林。相如方燕好，莫奏白頭吟。

出塞行

辭家赴國難，萬里向金微。寒日明朱戟，秋霜帶鐵衣。黃雲隨陣落，白雁傍人飛。不斬樓蘭將，長驅誓不歸。

懷徐伯臣宋子明王亮卿宣允則諸君

不見故人書，故人情轉疏。相看一別後，今已十年餘。水國寒雲渺，山窗夜月虛。可堪秋欲半，落葉遍庭除。

吳淞晚行

驛路晚悠悠，行人促去舟。鄉心懸落雁，客夢入新秋。澤氣蒸雲起，江聲帶雨流。松陵看欲近，沽酒慰離憂。

觀天目山瀑布

誰將千尺練，挂向碧峰頭。晴洒長空雨，寒生六月秋。寒風銀浪涌，閃日雪花浮。不作涓涓滴，陰崖只暗流。

曉行

客行寧畏早，殘夜度關城。野店月猶在，孤村鷄未

鳴。烟深疑路失，寒重覺裘輕。去去明河沒，東方白漸生。

贈錢祠部兄弟

二妙新承寵，同登漢省郎。聯鑣趨建禮，散佩出文昌。道協夔龍會，名齊翰墨場。退朝賓從列，門第有輝光。

酬張符臺秋夜直閣見寄

禁苑含香入，高秋複道平。疏星移鳳闕，明月映龍城。夜半聞天語，風前遲漏聲。思君在霄漢，清夢隔蓬瀛。

過留城謁張子房廟

報仇仍佐漢，昔志已能酬。廟豈鄉人祀，功將太史收。一編黃石略，萬里赤松游。永謝韓彭累，高風千古流。

送張朝使使朝鮮便道還浙

丹命辭仙闕，緋衣返故鄉。九天持漢節，萬里拜夷王。舟撼波濤壯，旌搖日月光。遙看諸屬國，奔走使車傍。

送竹冠道人游天都山

驅雞別仙婦，萬里訪天都。囊秘長生藥，身藏五岳圖。閑心憐水石，浪迹滿江湖。鶴背千峰冷，西風劍氣孤。

宿五層樓

危樓凌碧落，俯眺萬山秋。明月樽前過，銀河檻外流。高歌振林木，清夢落滄洲。夜半聞笙鶴，翻疑霄漢游。

春日寄直閣林員外

仙郎散佩侍彤闈，候吏焚香護賜衣。親捧紫泥傳禁語，時登青瑣沐恩輝。飄花細傍宮牆出，乳燕斜穿御路飛。退食省中無一事，晚來信馬柳邊歸。

憶昔

憶昔吳門秋可憐，澹烟疏柳夕陽天。青山易得芳時樂，白雪難逢寡和篇。茂苑舊游孤月外，橫塘新曲晚風前。只今卧病雲山隔，野水蘆花一釣船。水落天空潄氣收，微茫烟渚隔沙邱。寒催砧杵千家月，霜到關河幾樹秋。聲斷塞雲聞雁過，光侵池

草見螢流。感時王粲心徒切，獨倚荆南萬里樓。

新秋感懷

酒罷高歌清夜闌，年來猶自滯長安。片雲將雨消殘暑，斷雁迎風動早寒。鄉國渺茫勞夢遠，江湖飄泊識交難。欲歸未定緣何事，短缺無心向客彈。

贈陸郎中歸隱林屋

石林幽勝遠人群，清隱于今獨有君。暑去未消岩下雪，風來猶帶澗邊雲。半窗月色留僧話，一徑松陰共鶴分。遙想北山著書處，他年應不愧移文。

清明日思家

紫陌新烟出漢宮，柔桑遍綠杏枝紅。樓臺半落梨花雨，簾幕斜吹燕子風。物候漸隨時思改，酒杯猶喜故人同。朝來亦有還家夢，無那鶯聲到枕中。

酬陳鳴野見寄

千里勞君問索居，江空歲晚獨愁予。只緣嶺外無來雁，莫道天涯少寄書。草徑秋深吟蟋蟀，石池霜冷落芙蓉。關河迢遞風塵隔，兩地同看月色虛。

送徐子明書記赴邊

赤塞塵沙迴未平，多君意氣喜論兵。已經楚上三年別，還作雲中萬里行。霽雪射雕青海岸，秋風走馬白狼城。即隨驃騎承恩澤，猶勝芸窗老此生。

崖門吊古

風吹錦艦覆江濱，回首神京半已塵。蘇武豈能臣異國，仲連寧肯帝嬴秦。天邊星隕妖先見，海上龍興識未真。父老只今猶抱恨，每逢寒食薦芳蘋。中原戰血灑晴烟，末祚逢厓事可憐。禍勝六宮南渡日，仇深二帝北歸年。奸諛誤國情堪憤，閩廣圖安勢已偏。千古忠魂消不得，怒濤長咽海門天。

野樹雲垂古廟陰，愁翻白浪衆山沉。捐身萬里孤臣淚，誓死三軍戀主心。日照乾坤餘正氣，寒生風雨助哀吟。茫茫滄海深如許，不似行人恨更深。

贈丁戌山人還閩中

海內名山已遍游，西風歸卧幔亭秋。有時見月頻呼酒，盡日看雲獨倚樓。采藥不辭松徑遠，題詩偏愛石岩幽。拂衣我欲從君去，九曲溪邊泛釣舟。

晉興道中

水接湘江深復深，楚山迢遞映楓林。四時不斷烟嵐色，兩岸唯聞猿鳥音。帝子廟荒霜竹冷，伏波臺古暮潮侵。蒼梧回首浮雲渺，明月清砧動客心。

夏日同姚子玉費子文游雲居寺

蒼烟白石滿空山，野寺深藏亂竹間。游客漫隨清磬入，老僧長對落花間。潭邊宿雨從龍去，樹底殘雲伴鶴還。盡日臨流恣幽賞，披襟坐遍石苔斑。

渡河

千里關山客裏過，北來征旆渡黃河。天低野樹寒雲盡，日落平原戰馬多。草獵陰風啼虎豹，沙飛白浪舞蛟鼉。驚看漢業俱塵土，莫唱高臺猛士歌。

隱居

隱居何必向山林，松徑行歌散素襟。門外蒼苔來客少，雨中啼鳥落花深。談玄喜就高僧坐，對酒長呼孺子吟。身似閑雲隨所適，悠悠出入本無心。

經易州界

塞北時聞鐵馬嘶，薊門霜柳漸淒淒。天邊野燒連

烽火，城下寒砧雜鼓鼙。陰迹草荒狐隊出，平原風急雁行低。尊前不見悲歌客，易水東流何日西。

五月十五夜駕詣南郊

祈壇瑞氣碧氤氳，合殿松杉絢彩雲。繚繞霓旌回北斗，悠揚仙樂度南薰。龍飛玉帛群靈會，雁列衣冠萬國分。愧比揚雄侍清蹕，擬將詞賦獻明君。

長安見雪

積素凝寒透瑣闌，亂鋪風片轉輝輝。祥占太史春偏早，曲奏仙郎和更稀。色映瑤臺迷鶴舞，光搖銀樹失花飛。玉河堤畔人歸晚，帶得瓊珠滿客衣。

度薊門關贈李參戎

千盤磴道涉鳩瀆，今古華夷向此分。雪嶺有天行赤日，玉關無地不黃雲。郊墟漸息諸烽堠，野澤閑歸萬馬群。無數王師守邊郡，胡兒空識李將軍。

寄劉珠江陳中閣黎瑤石諸社丈

莫向塵氛嘆路歧，百年心事故人知。感時潘岳餘雙鬢，出塞梁鴻賦五噫。洲渚月明潮落早，蒹葭霜冷月來遲。悲笳近報邊聲急，鄉國東歸未可期。

登慈雲嶺

裊裊丹梯一徑懸，石門草色鬥芳鮮。諸天磬落重林外，六月寒生疊嶂前。雲擁翠蘿翻劍壁，雷喧白晝瀉龍泉。回看天際飛濤卷，碧海茫茫起暮烟。

潯陽夜泊懷故園朱虛亭熊兩谷諸丈雲屏

華原兩弟

江邊疏竹帶寒沙，客裏開樽感歲華。詩酒故人同海內，風塵諸弟隔天涯。鄉心迢遞頻看月，秋夜分明數到家。幾處吹笳戎馬後，不聞商女弄琵琶。

偕姚唯之宿甘露寺

城頭山勢隱樓臺，千古禪宮向水開。帆帶暮雲歸海去，風吹明月過江來。數宵清話分僧榻，一片閒情付酒杯。世事悠悠君莫問，寒潮東下幾時回。

春日與客對酌

壯歲逢春倍惜春，春來行樂勿辭頻。花邊啼鳥長留客，鏡裏流光不待人。天地與君皆逆旅，江湖容我一閑身。放歌對酒須沉醉，莫問秋風白髮新。

寄廣陵高子通徐伯可

憶昔逢君客帝京，留連詩酒十年情。看花并醉長千里，走馬同過白下城。春入吳宮芳草色，月明蕭寺暮鐘聲。別來迢遞天南北，一望江湖感慨生。

吳興寄龐鎮卿京兆

燕郊斗酒憶論文，白下音書久未聞。海色暗浮吳苑樹，星光虛映雪川雲。心隨北極瞻龍馭，目斷西風數雁群。一自山中叢桂發，秋來無日不思君。

送嚴五避亂之楚

避地移家向楚城，憐君飄泊見平生。亂離只益傷秋思，衰病那堪遠別情。孤劍鳴風餘俠氣，寒笳吹月動邊聲。愁心已逐衡陽雁，一路低飛送客行。

燕京懷友

客愁不為食無魚，倚劍臨風嘆索居。燕地雪深寒獨早，衡陽雁遠信應疏。狂來阮籍惟耽酒，病去虞卿只著書。滿目烽烟關塞隔，故人消息近何如。

秋夜滕王閣登眺答林舍人見寄

滕王高閣入虛清，萬里銀河倚檻橫。七澤風烟秋

澹澹，九江波浪夜溟溟。斗間不見龍驂影，雲外空聞鳳吹聲。千載獨留歌舞地，西山月色向人明。

送何員外之南都

金陵自古帝王城，此去仙帆幾日程。鵲觀前秋水綠，鳳凰臺上晚風清。身歸省署新承寵，道在河汾舊著名。惜別天涯驚歲暮，隴雲江樹總含情。

泛彭蠡湖

浩蕩湖光迥，虛涵河漢明。萬峰朝靄淨，一葦客帆輕。地跨三吳勝，江連七澤平。魚龍時隱見，舟楫互縱橫。日月浮金暈，風波激玉聲。方壺晴掩映，圓嶠遠崢嶸。陽鳥寒衣渚，殘虹夕抱城。感時思擊楫，俯念愧登瀛。塞北猶防變，江東未解兵。艱危堪涕淚，回首憶神京。

游三洲岩

靈源標勝概，碧洞秘瑤華。曠野千峰出，橫橋一水斜。松蘿迷客徑，鷄犬隔人家。石室雲常暗，山樓樹半遮。巖巔垂玉乳，泉際引金沙。仙樂和啼鳥，天香散落花。開樽留晚照，揮袂駐飛霞。延眺娛心

賞，追游興未涯。

酬徐伯臣見寄

孺子南州彥，新詩海內傳。因風奏金石，使我挹蘭筌。鸞嘯蘇門隱，鳬飛漢代仙。襟期同白社，人物似斜川。登陟盧敖杖，浮游范蠡船。閑居知有賦，習靜久懷玄。綠綺烟霞外，青山几席邊。黃初窺制作，墨綬謝塵緣。草聖夸前代，萍踪憶往年。關河看咫尺，吳越隔風烟。服氣神符妙，修真寶訣全。懸知千載後，石室秘瑤篇。

江南曲

蕩槳越江邊，烟深江水綠。不見采蓮人，空聞采蓮曲。

采蓮擘蓮實，一半是空房。折得同心藕，牽絲何太長。

春曉

枕上雨初歇，庭前花亂開。春風在高樹，啼鳥去還來。

古鏡詞

古鏡明如月，珍藏玉匣深。羞將照妾影，留取照郎心。

夜坐

松風敲劍壁，花露滴琴床。坐對前峰月，空山叢桂香。

伊州歌

聞道移軍去，音書誰為傳。漁陽萬里道，一夢到君前。

古意

花落春愁黯，鶯啼曉夢醒。柳絲長若許，難系別離情。

對酒

花落還再春，人老無復少。高歌對美酒，且向花前笑。

登天目山

雪積深林暑氣微，山僧六月著寒衣。片雲天外因風至，白日岩前作雨飛。

有感

三輔頻年說募兵，黃龍歸後幾時平。兒童月下吹蘆管，半是秋風塞上聲。

白下別宗秀才

逢君忽復送君行，客路悠悠江海情。且盡殷勤花下酒，由來醉裏別離輕。

游泰山

驅日鞭雲騎赤龍，三生石上采芙蓉。振衣直躡仙人掌，拄杖時攀玉女峰。
路入天門渺九州，三山隱約海東頭。此身迴在雲霄上，俯視黃河一綫流。
明堂最上接天池，封禪靈墟迹尚遺。漢碣半留千古字，秦松高偃萬年枝。
日觀平臨滄海東，天鷄啼處夜方中。遙看金暈扶桑起，照見峰頭萬樹紅。
重重雲闕鬥嶙峋，白晝風雷走百神。石室春深人不不到，空餘玉簡照乾坤。